

Waar is de Schandaal?

Vilicht is de Fraag, de ik hier as Überschrift nohmen hebb, för vandaag noch en bietje to froh – tominnst, wenn een de Fraag ironisch versteiht. Man upstünd sücht dat doch so ut, as wenn 't up uns Straten ehrder sachter word as feller. Dat liggt to en grote Deel an de Elektroautos. Daar verfehrt een sük ja faken noog, wenn een so en Auto van achtern överhalen deit. Lange vörbi schient de Tied, as Felligheid van Motoren datsülvi-ge was as Qualität. Dat de Lüü dat sonore Rödelrödel van en Mercedes 200 D, dat gewaltige Tuckern van en Lanz Bulldog of dat obstenaatske Dengeln van en VW-Boxermotor maal leep wat in d' Reken harren – daar kann sük de junge Generation seker kien Riem mehr up maken. Nich blot de Elektroautos, ok de anner Kraftwagens bit hen to Lastwagens un Bussen holten sük vandaag so tuuk, as se eets könen.

Klaar, nix geböhrt sünner Tegenstöö, un tegen de sachte Elektroautos giff dat ok de Lüü, de mit hör upmotzt Güttjemecheels mit Fliet Schandaal maken un daar ok noch mit herumsnarren – verbodenerwies. Man Elektroautomoto-

KOLUMNE

Moin, Moin
Schrievers
allerbest
Pläseer
Smüstern
Spraak
moje
hoop
Vertellisel

Platt maakt



Wilko Lucht gehört zum Team der Autoren, die die plattdeutsche Kolumne „Platt maakt“ schreiben.

bilisten sünd na mien Dünken vandaag faker up düütske Straten vertreden as Motorenschandaal-Snarrders.

Wenn een de Fraag van de Überschrift nich ironisch verstahn un hum direkt beantworten will, denn mutt een woll seggen: De Schandaal is van buten na binnen wannert. Denn ok wenn de Elektro- un anner Autos hör Schandaal minnerseren, is daar bi Huushaltsgerätschuppen nix van to marken. Huulbesens hör Qualität is al alltied in Dezibel meten wor-

den, dat is bit vandaag so bleven. Ok in Oostfreesland hebben all mehr Huusholens Koffje-Vull-Automaten, un ok bi sülken word Knööv na Schandaal taexeert. Bi Tuffelchips un anner Knabberee is dat nich anners. Knabberee is för Lüü, de gern gnauen. Well gnaut, liggt in d' Trend – tominnst solange he 't in sien egen veer Wannan maken deit.

Man so mackelk, as ik dat hier daarstellt hebb, is dat ja doch weer nich. Dat fahren alltied noch mehr felle Verbrannermotoren döer d' Kuntrei as sachte Elektromotoren.

Wenn ik en Lüntje fleiten hören will, sünner dat d'r anner Schandaal tüskenkummt, mutt ik al deep in 't Holt krupen. Wenn ik mi up Sömmerdag bi 't Restaurant in buten wat setten laten will, denn leggt de Springpütt van tegegan sien Ostinato daarunner. Kien Froststückspaus bi d' Arbeit sünner dat Gehuul van d' Waterkoker. Van de Bauarbeiters bi mi tegegan proot ik gaar nich. Man wat sall 't, Schandaaltrends wesseln sük of, man eens bliff: Waar de Minske togange is, daar giff 't ok Schandaal. Weer ja ok leep, wenn 't anners weer.